閩/文史/☆☆☆★

## 燒銀紙佮放炮仔

我相信燒銀紙佮放炮仔應該毋是咱原住民祖先的舊慣勢,真有可能是咱的唐山祖對遐紮過來的。

若講起燒銀紙的源頭,傳說真濟。講來講去,若毋是欲共壽命該終的性命買轉來,就是 用來做買路錢,欲共牛頭馬面的鬼神鳥西,予亡魂一路通順無阻礙。燒銀紙當然嘛包含燒金, 燒金是欲敬拜神明的,全款是鳥西神明來共人保庇的。以早捌有人借燒金的名去到廟寺做歹 名聲的代誌,所以才有「捾籃仔假燒金」的俗語。

傳統的銀紙是用竹仔製造的,造紙的過程中著愛用袂少真強烈的化學原料佮真濟的水。造紙所排出來的廢水,對河川的汙染嘛非常的嚴重。咱臺灣一年燒去的銀紙應該是不計其數,造成的空氣汙染嘛仝款非常的嚴重。我捌講起直接提欲買銀紙的錢來燒就好,通減少對環境的汙染,就有人應我講按呢會犯著「毀損國幣」的罪,我就應講,啊若提新臺票去換做美金、日幣抑是其他的外幣來燒,毋就無代誌矣!毋過講罔講,真正換著外幣,嘛是燒袂落手。其實若是用燒支票、本票抑是信用卡來代替燒銀紙,嘛是省事事省,有好無穩啊。

啊若講起放炮仔,代誌嘛滿滿是。因為炮仔的製造佮放炮仔這件代誌,定定會發生災害。咱知影放炮仔的目的真濟款,不而過,放炮仔有時是放的人爽、邊仔的人定定有人真袂爽。 幾年前桃園有一个朋友咧娶新婦的時,伊是用放片仔的方式來代替放炮仔的,予我想起講咱嘛會使得用佇別款的都合啊。會使用佇房間、客廳、厝內、外口,甚至是塚仔埔等等各種的場合,嘛會使得佇透早、半暝仔抑是暗時仔來放,欲偌大聲抑是偌細聲由在你調整,家己爽閣袂去吵著別人,敢毋是逐家平安喜樂咧?

向望燒銀紙佮放炮仔的舊慣勢,會當成做較有環保意識的新做法。

作者: 陳憲國

## ☆詞彙學習☆

【鳥西】oo-se:賄賂,源自日語

【不而過】put-jī-kò:不過

【都合】 too-hap:狀況

【塚仔埔】thióng-á-poo:墓園

## ☆文法學習☆

【燒袂落手】:動詞+「袂」+補語,是一種用來表示無法做到某個狀態的講法,多用於和身體部位有關的況狀。而與此否定句式相對的肯定句,則是把「袂」改成「會」,但經常用在反詰語氣,以本句來說就是「敢燒會落手?」其他類似的例子如「行袂開跤」、「講袂出喙」、「疼袂落心」、「聽袂入耳」、「睏袂落眠」等等。

《臺灣閩南語常用詞辭典》 http://twblq.dict.edu.tw